

TILSKIPUN EVRÓPUÞINGSINS OG RÁÐSINS 2014/55/ESB

2015/EES/63/32

frá 16. apríl 2014

um rafræna reikningagerð í opinberum innkaupum (*)

EVROPUÞINGIÐ OG RÁÐ EVRÓPUSAMBANDSINS HAFAR,

með hliðsjón af sáttmálanum um starfshætti Evrópusambandsins, einkum 114. gr.,

með hliðsjón af tillögu framkvæmdastjórnarinnar,

eftir að hafa lagt drög að lagagerð fyrir þjóðþingin,

með hliðsjón af álitum efnahags- og félagsmálanefndar Evrópusambandsins ⁽¹⁾,

með hliðsjón af álitum svæðanefndarinnar ⁽²⁾,

í samræmi við almenna lagasetningarmeðferð ⁽³⁾,

og að teknu tilliti til eftirfarandi:

- 1) Nokkrir alþjóðlegir, landsbundnir og svæðisbundnir staðlar, ásamt stöðlum einstakra fyrirtækja, um rafræna reikninga eru fyrir hendi og eru nú notaðir í aðildarríkjunum. Enginn þessara staðla gengur öðrum framur og fæstir þeirra eru rekstrarsamhæfir hverjir öðrum.
- 2) Þar sem sameiginlegur staðall er ekki fyrir hendi er það aðildarríkjanna að ákveða sínar eigin tæknilegu lausnir, sem byggjast á einstökum landsstöðlum, þegar þau hvetja til notkunar rafræna reikninga í opinberum innkaupum eða gera notkun þeirra skyldubundna. Þar af leiðandi fer mismunandi stöðlum sem notaðir eru samhliða í aðildarríkjunum fjölga og mun líklega fjölga enn frekar í framtíðinni.
- 3) Fjölbreytni staðla sem eru ekki rekstrarsamhæfir leiðir af sér hátt flækjustig, réttaróvissu og aukalegan rekstrarkostnað fyrir rekstraraðila sem nota rafræna reikninga milli aðildarríkja. Rekstraraðilar sem óska eftir að stunda innkaup yfir landamæri þurfa oft að uppfylla nýjan staðal um rafræna reikningagerð í hvert sinn sem þeir fá aðgang að nýjum markaði. Þar sem hinar ólíku lagalegu og tæknilegu kröfur varðandi rafræna reikninga letja rekstraraðila til að stunda innkaup yfir landamæri eru þær hindranir á markaðsaðgangi við opinber innkaup yfir landamæri og viðskiptahindranir. Þær standa í vegi fyrir grundvallarréttindum og hafa þannig bein áhrif á starfsemi innri markaðarins.
- 4) Þessar hindranir á viðskiptum innan Sambandsins munu líklega aukast í framtíðinni þegar þróaðir verða fleiri staðlar einstakra aðildarríkja og einkafyrirtækja sem ekki eru rekstrarsamhæfir, jafnframt því sem notkun rafræna reikninga í opinberum innkaupum verður enn almennari eða verður gerð skyldubundin í aðildarríkjunum.

(*) Þessi ESB-gerð birtist í Stjtið. ESB L 133, 6.5.2014, bls. 1. Hennar var getið í ákvörðun sameiginlegu EES-nefndarinnar nr. 166/2015 frá 11. júní 2015 um breytingu á XVI. viðauka (Opinber innkaup) við EES-samninginn, biður birtingar.

⁽¹⁾ Stjtið. ESB C 79, 6.3.2014, bls. 67.

⁽²⁾ Álitum var skilað 28. nóvember 2013 (hefur enn ekki verið birt í *Stjórnartíðindunum*).

⁽³⁾ Afstaða Evrópuþingsins frá 11. mars 2014 (hefur enn ekki verið birt í *Stjórnartíðindunum*) og ákvörðun ráðsins frá 14. apríl 2014.

- 5) Ryðja ætti úr vegi eða draga úr hindrunum á viðskiptum yfir landamæri sem stafa af því að nokkur lagaskilyrði og tæknistaðlar um rafræna reikningagerð eru fyrir hendi samhliða og af skorti á rekstrarsamhæfi þeirra. Til að ná þessu markmiði ætti að þróa sameiginlegan evrópskan staðal um merkingarfræðilegt gagnalíkan fyrir meginstök rafræns reiknings („Evrópustaðall um rafræna reikningagerð“). Í staðlinum ætti að setja fram og lýsa þeim meginstökum sem rafrænn reikningur þarf alltaf að innihalda og auðvelda þannig sendingu og móttöku rafrænna reikninga milli kerfa sem byggjast á mismunandi tæknistöðlum. Þessi staðall ætti hvorki að koma í stað landsbundinna tæknistaðla sem þegar eru fyrir hendi né heldur ætti að setja takmörk fyrir notkun þeirra, að því tilskildu að þeir fari ekki í bága við þennan Evrópustaðal, og áframhaldandi notkun þeirra ætti að vera möguleg samhliða Evrópustaðlinum.
- 6) Með því að tryggja merkingarfræðilegt rekstrarsamhæfi og bæta réttarvissu mun tilskipun þessi stuðla að því að tekin verði upp rafræn reikningagerð í opinberum innkaupum og gera aðildarríkjum, samningsyfirvöldum, samningsstofnunum og rekstraraðilum þar með kleift að skapa umtalsverðan ávinning með tilliti til sparnaðar, umhverfisáhrifa og minna stjórnsýsluálags.
- 7) Hámarksávinningur af rafrænni reikningagerð næst þegar gera má gerð, sendingu, afhendingu, móttöku og meðferð reiknings algerlega sjálfvirka. Af þessum sökum ættu einungis tölvulesanlegir reikningar, sem viðtakandinn getur unnið úr sjálfvirkt og stafrænt, að teljast uppfylla Evrópustaðalinn um rafræna reikningagerð. Að því er varðar þessa tilskipun ætti ekki að líta svo á að myndskrá ein og sér sé rafrænn reikningur.
- 8) Markmið rekstrarsamhæfis er að mögulegt sé að setja fram og vinna úr upplýsingum með samræmdum hætti milli viðskiptakerfa, óháð tækni, notkun eða vettvangi sem um er að ræða. Fullt rekstrarsamhæfi felur í sér getu til rekstrarsamhæfis á þremur stigum: að því er varðar innihald reikningsins (merkingarfræði), form eða tungumál sem notað er (málskipan) og aðferð við sendingu. Merkingarfræðilegt rekstrarsamhæfi felur í sér að rafrænn reikningur inniheldur tiltekið magn tilskilinna upplýsinga og að nákvæm merking upplýsinganna, sem miðlað er, varðveitist og skilst á ótvíræðan hátt, óháð því hvernig þær eru efnislega settar fram eða sendar. Rekstrarsamhæfi er varðar málskipan felur í sér að gagnastök rafræns reiknings eru sett fram á sniði sem sendandi og viðtakandi geta skipst á beint og unnið úr sjálfvirkt. Rekstrarsamhæfi er varðar málskipan má tryggja á tvennan hátt, nánar tiltekið með því að nota sameiginlega málskipan eða með kortlagningu (e. mapping) ólíkra tilvika um málskipan.
- 9) Margt konar málskipan er í notkun. Rekstrarsamhæf málskipan er í síauknum mæli tryggð með kortlagningu. Þessi aðferð er skilvirk ef reikningurinn inniheldur öll nauðsynleg gagnastök á merkingarfræðilegu stigi og ef merking þeirra er ótvíræð. Þar sem því er oft ekki þannig farið er þörf á aðgerð til að tryggja rekstrarsamhæfi á merkingarfræðilegu stigi. Til að einfalda enn frekar notkun rafrænnar reikningagerðar og draga úr kostnaði ætti eitt af markmiðunum til langs tíma að vera að takmarka fjölda málskipanargerða sem eru í notkun, helst með því að leggja áherslu á þær sem eru algengastar.
- 10) Stöðlun rafrænnar reikningagerðar kemur einnig til fyllingar viðleitni til að stuðla að því að tekin verði upp rafræn innkaup eins og endurspeglast í viðkomandi ákvæðum tilskipunar Evrópuþingsins og ráðsins 2014/24/ESB ⁽⁴⁾ og tilskipunar Evrópuþingsins og ráðsins 2014/25/ESB ⁽⁵⁾.
- 11) Leiðtogaráðið lýsti því yfir, í ályktunum sínum frá 28. og 29. júní 2012 og 24. október 2013, að setja skyldi í forgang ráðstafanir sem miða að því að þróa áfram viðskipti á Netinu sem ná yfir landamæri og nútímavæðingu opinberrar stjórnsýslu, m.a. með því að greiða fyrir umskiptum yfir í rafræna reikningagerð og hrinda henni hratt í framkvæmd.
- 12) Evrópuþingið vakti í ályktun sinni frá 20. apríl 2012 athygli á klofnun markaðarins af völdum landsreglna um rafræna reikningagerð, lagði áherslu á að rafræn reikningagerð hefði í för með sér verulegan ávinning og nauðsyn þess að réttarvissa, skýrt tæknilegt umhverfi og opnar og rekstrarsamhæfðar lausnir á rafrænni reikningagerð, sem byggðust á sameiginlegum lagalegum

⁽⁴⁾ Tilskipun Evrópuþingsins og ráðsins 2014/24/ESB frá 26. febrúar 2014 um opinber innkaup og niðurfellingu tilskipunar 2004/18/EB (Stjtið. ESB L 94, 28.3.2014, bls. 65).

⁽⁵⁾ Tilskipun Evrópuþingsins og ráðsins 2014/25/ESB frá 26. febrúar 2014 um innkaup stofnana sem annast vatnsveitu, orkuveitu, flutninga og pósthjónustu og um niðurfellingu tilskipunar 2004/17/EB (Stjtið. ESB L 94, 28.3.2014, bls. 243).

kröfum, viðskiptaferlum og tæknistöðlum, væru fyrir hendi. Af þessum sökum hvatti Evrópuþingið til þess að rafræn reikningagerð yrði gerð skyldubundin í opinberum innkaupum eigi síðar en 2016.

- 13) Evrópski fjölhagsmunavettvangurinn um rafræna reikningagerð, sem komið var á fót með ákvörðun framkvæmdastjórnarinnar frá 2. nóvember 2010 ⁽⁶⁾, samþykkti einróma í október 2013 tilmæli um notkun merkingarfræðilegs gagnalíkans til að styðja rekstrarsamhæfi rafrænnar reikningagerðar.
- 14) Tilskipun þessi ætti að gilda um rafræna reikninga sem samningsyfirvöld og samningsstofnanir taka á móti og eru gefnir út vegna framkvæmdar samninga sem tilskipun Evrópuþingsins og ráðsins 2009/81/EB ⁽⁷⁾, tilskipun Evrópuþingsins og ráðsins 2014/23/ESB ⁽⁸⁾, tilskipun 2014/24/ESB eða tilskipun 2014/25/ESB gildir um. Einungis rafrænar reikningar sem eru gefnir út af rekstraraðilanum, sem opinberi samningurinn eða sérleyfissamningurinn var gerður við (aðalverktakanum), ættu að falla undir þessa tilskipun. Þegar aðildarríkin kveða á um beinar greiðslur til undirverktaka skv. 71. gr. tilskipunar 2014/24/ESB og 88. gr. tilskipunar 2014/25/ESB ætti tilhögunin, sem ber að fastsetja í útboðsgögnunum, að hafa að geyma ákvæði um hvort nota skuli rafræna reikningagerð eður ei hvað varðar greiðslur til undirverktaka. Koma ætti skýrt fram að þegar samningur er gerður við hóp rekstraraðila gildir þessi tilskipun bæði um rafræna reikninga sem hópurinn gefur út og af einstökum rekstraraðilum innan hans.
- 15) Tilskipun þessi ætti einnig að gilda um sérleyfissamninga sem fela í sér greiðslu sem krefst þess að reikningar séu gefnir út af rekstraraðilanum sem sérleyfissamningurinn var gerður við. Hugtakið „sérleyfi“ er skilgreint í 1. lið 5. gr. tilskipunar 2014/23/ESB. Tilgangur sérleyfissamninga eru innkaup verka eða þjónustu með veitingu sérleyfis, þar sem endurgjaldið felst í réttinum til að hagnýta verkið eða þjónustuna eða í þeim rétti ásamt greiðslu.
- 16) Tilskipun þessi er með fyrirvara um 346. gr. sáttmálans um starfshætti Evrópusambandsins. Tilskipun þessi gildir ekki um rafræna reikninga sem gefnir eru út vegna framkvæmdar samninga (sem tilkynnt er að séu leynilegir eða sem fylgja sérhæfðar öryggisráðstafanir), sem falla utan gildissviðs tilskipunar 2014/23/ESB, tilskipunar 2014/24/ESB og tilskipunar 2014/25/ESB skv. 10. gr. (6. mgr.), 15. gr. (3. mgr.) og 24. gr. (3. mgr.) eftir því sem við á. Samkvæmt sömu skilyrðum ætti í tilskipun þessari að kveða á um að rafrænar reikningar, sem eru gefnir út vegna framkvæmdar slíkra samninga (sem tilkynnt er að séu leynilegir eða sem fylgja sérhæfðar öryggisráðstafanir), sem falla undir gildissvið tilskipunar 2009/81/EB, séu sérstaklega undanskildir.
- 17) Skilgreiningarnar í þessari tilskipun ættu að vera í samræmi við aðra löggjöf Sambandsins um opinber innkaup.
- 18) Framkvæmdastjórnin ætti að beita viðeigandi ákvæðum reglugerðar Evrópuþingsins og ráðsins (ESB) nr. 1025/2012 ⁽⁹⁾ til að óska eftir því að viðeigandi evrópsk staðlastofnun semji Evrópustaðal um rafræna reikningagerð. Samkvæmt viðeigandi ákvæðum reglugerðar (ESB) nr. 1025/2012 fellur ákvörðun framkvæmdastjórnarinnar um að leggja fram slíka beiðni undir rannsóknarmálsmeðferðina sem um getur í reglugerð Evrópuþingsins og ráðsins (ESB) nr. 182/2011 ⁽¹⁰⁾.
- 19) Evrópustaðall um rafræna reikningagerð ætti að byggjast á gildandi tækniforskriftum sem hafa verið þróaðar innan ramma evrópskra staðlastofnana á borð við Staðlasamtök Evrópu (CEN) (CWA 16356-MUG og CWA 16562-CEN BII) og ætti að taka tillit til annarra viðeigandi tækniforskrifta sem hafa verið þróaðar innan ramma alþjóðlegra staðlastofnana s.s. UN/CEFACT (CII v. 2.0) og Alþjóðlegu

⁽⁶⁾ Ákvörðun framkvæmdastjórnarinnar frá 2. nóvember 2010 um evrópskan fjölhagsmunavettvang um rafræna reikningagerð (rafrænar reikningar) (Stjtið. ESB C 326, 3.12.2010, bls. 13).

⁽⁷⁾ Tilskipun Evrópuþingsins og ráðsins 2009/81/EB frá 13. júlí 2009 um samræmingu reglna um útboð og gerð samningsyfirvalda eða samningsstofnana á tilteknum verksamningum, vörusamningum og þjónustusamningum á sviði varnar- og öryggismála og um breytingu á tilskipunum 2004/17/EB og 2004/18/EB (Stjtið. ESB L 216, 20.8.2009, bls. 76).

⁽⁸⁾ Tilskipun Evrópuþingsins og ráðsins 2014/23/ESB frá 26. febrúar 2014 um gerð sérleyfissamninga (Stjtið. ESB L 94, 28.3.2014, bls. 1).

⁽⁹⁾ Reglugerð Evrópuþingsins og ráðsins (ESB) nr. 1025/2012 frá 25. október 2012 um evrópska stöðlun og breytingu á tilskipunum ráðsins 89/686/EBE og 93/15/EBE og tilskipunum Evrópuþingsins og ráðsins 94/9/EB, 94/25/EB, 95/16/EB, 97/23/EB, 98/34/EB, 2004/22/EB, 2007/23/EB, 2009/23/EB og 2009/105/EB og niðurfellingu á ákvörðun ráðsins 87/95/EBE og ákvörðun Evrópuþingsins og ráðsins nr. 1673/2006/EB (Stjtið. ESB L 316, 14.11.2012, bls. 12).

⁽¹⁰⁾ Reglugerð Evrópuþingsins og ráðsins (ESB) nr. 182/2011 frá 16. febrúar 2011 um reglur og almennar meginreglur varðandi tilhögun efulríts aðildarríkjanna með framkvæmdastjórninni þegar hún beitir framkvæmdarvaldi sínu (Stjtið. ESB L 55, 28.2.2011, bls. 13).

staðlasamtökin (ISO) (fjárhagslegur reikningur byggður á aðferðafræði staðals ISO 20022). Þegar viðkomandi evrópsk staðlastofnun framkvæmir beiðni um stöðlun ætti hún einnig að taka tillit til niðurstaðna stórra tilraunaverkefna sem framkvæmd eru innan ramma stuðningsáætlunarinnar í rammaáætluninni um samkeppnishæfni og nýsköpun og tækniforskrifta annarra viðeigandi stofnana og samtaka um rafræna reikningagerð, sem eru almennt notaðar í atvinnulífnum. Evrópustaðallinn um rafræna reikningagerð ætti einnig að samrýmast gildandi stöðlum um greiðslur svo unnt verði að framkvæma greiðslur sjálfvirkt.

- 20) Framkvæmdastjórnin ætti að fara fram á það í beiðni sinni til evrópskra staðlastofnana að Evrópustaðallinn um rafræna reikningagerð verði tæknilega hlutlaus til að forðast röskun á samkeppni, að hann samrýmist viðeigandi alþjóðlegum stöðlum um rafræna reikningagerð til að koma í veg fyrir að birgjar frá þriðju löndum verði fyrir tæknilegum hindrunum á markaðsaðgangi og auðvelda evrópskum birgjum að senda kaupendum í þriðju löndum rafræna reikninga, og að hann sé í samræmi við tilskipun ráðsins 2006/112/EB ⁽¹⁾. Þar sem rafrænir reikningar geta innihaldið persónuupplýsingar ætti framkvæmdastjórnin einnig að fara fram á að í rafrænni reikningagerð sé tekið tillit til verndar persónuupplýsingum í samræmi við tilskipun Evrópuþingsins og ráðsins 95/46/EB ⁽²⁾ og meginreglnanna um innbyggða gagnavernd, meðalhöf og lágmarkun gagna. Auk þessara lágmarkskrafa ætti framkvæmdastjórnin að ákvarða frekari kröfur í beiðni sinni til viðkomandi evrópskrar staðlastofnunar að því er varðar innihald Evrópustaðalsins um rafræna reikningagerð og frest til að samþykkja hann.
- 21) Til að tryggja að lítil og meðalstór fyrirtæki geti einnig notið góðs af rafrænni reikningagerð í opinberum innkaupum ætti Evrópustaðallinn um rafræna reikningagerð að gera það mögulegt að koma á fót notendavænum kerfum fyrir rafræna reikningagerð, þ.e. kerfum sem eru auðskilin og auðvelt að nota. Í þessu sambandi ætti einnig að taka tillit til þess að einkum lítil og meðalstór fyrirtæki, einnig minni samningsyfirvöld og samningsstofnanir, hafa yfir takmörkuðu starfsfólki og fjármagni að ráða.
- 22) Evrópustaðallinn um rafræna reikningagerð ætti einnig að henta til notkunar í verslunarviðskiptum milli fyrirtækja. Til að einkareknum rekstraraðilum verði kleift að nota nýja staðalinn í viðskiptum sínum innbyrðis ætti framkvæmdastjórnin því að tryggja að staðallinn sé ekki þróaður þannig að hann henti einungis til notkunar á sviði opinberra innkaupa.
- 23) Reikningar sem eru gefnir út á mismunandi viðskiptasviðum geta krafist þess að teknar séu með upplýsingar sem eru sértækar fyrir þessi svið. Þó ættu allir reikningar að innihalda takmarkaðan fjölda sameiginlegra staðlaðra staka. Nauðsynlegt er að þessi stök séu fyrir hendi til að hægt sé að sannreyna hvort reikningurinn endurspeglar þau viðskipti sem liggja til grundvallar og tryggja að reikningurinn sé lagalega gildur. Skrá yfir þau stök, sem krafist er vegna virðisaukaskatts, er að finna í tilskipun 2006/112/EB. Evrópustaðallinn um rafræna reikningagerð ætti að vera í samræmi við þessi stök.
- 24) Evrópustaðallinn um rafræna reikningagerð ætti að skilgreina merkingarfræðileg gagnastök sem vísa einkum til viðbótargagna um seljanda og kaupanda, auðkennis ferlis, eigindi reikninga, upplýsinga um einstaka liði reikninga, upplýsinga um afhendingu ásamt greiðsluupplýsingum og -skilmálum. Meginstök rafrænna reikninga ættu að vera í hverjum slíkum reikningi. Þannig ætti að tryggja skýra og samræmda beitingu rafrænnar reikningagerðar.
- 25) Enda þótt sendandi rafræns reiknings ætti áfram að hafa möguleika á að ábyrgjast áreiðanlegan uppruna reikningsins og heilleika innihalds hans með ýmsum aðferðum, m.a. með rafrænni undirskrift, til að tryggja fylgni við tilskipun 2006/112/EB, ætti krafa um rafræna undirskrift ekki að vera einn af þáttunum í Evrópustaðlinum um rafræna reikningagerð.
- 26) Til að forðast óhóflegan kostnað og byrði fyrir samningsyfirvöld og samningsstofnanir ætti að fara þess á leit við viðeigandi evrópska staðlastofnun að hún ákvarði takmarkaða skrá yfir þá málskipan sem uppfyllir Evrópustaðalinn um rafræna reikningagerð. Umrædd skrá ætti ekki að vera hluti af Evrópustaðlinum um rafræna reikningagerð. Sú málskipan sem ákvörðuð er verður nú þegar að vera

⁽¹⁾ Tilskipun ráðsins 2006/112/EB frá 28. nóvember 2006 um sameiginlega virðisaukaskattkerfið (Stjtið. ESB L 347, 11.12.2006, bls. 1).

⁽²⁾ Tilskipun Evrópuþingsins og ráðsins 95/46/EB frá 24. október 1995 um vernd einstaklinga í tengslum við vinnslu persónuupplýsinga og um fjálsa miðlun slíkra upplýsinga (Stjtið. EB L 281, 23.11.1995, bls. 31).

almennt notuð með góðum árangri af rekstraraðilum og samningsyfirvöldum. Til að auðvelda og flýta framkvæmd af hálfu aðildarríkjanna ætti að fara fram á við viðeigandi evrópska staðlastofnun að hún hafi til reiðu viðeigandi málskipanarbindingar frá Evrópustaðlinum um rafræna reikningagerð við alla málskipan sem ákvörðuð er samkvæmt skránni. Málskipanarbindingar eru viðmiðunarreglur um hvernig staðallinn gæti komið fram í mismunandi tilvikum um málskipan. Þetta stöðlunarskjal ætti að koma til fyllingar Evrópustaðlinum um rafræna reikningagerð og skránni yfir málskipan.

- 27) Til að auðvelda notkun Evrópustaðalsins um rafræna reikningagerð ætti einnig að fara þess á leit við evrópsku staðlastofnunina að hún semji drög að viðmiðunarreglum um rekstrarsamhæfi sendingar. Þessar viðmiðunarreglur ættu ekki að vera hluti af Evrópustaðlinum um rafræna reikningagerð og ekki heldur vera bindandi fyrir samningsyfirvöld og samningsstofnanir.
- 28) Áður en Evrópustaðallinn um rafræna reikningagerð verður tekinn upp í aðildarríkjunum ætti að gera nægilegar prófanir á beitingu staðalsins í reynd. Þetta mat ætti að fara fram meðan verið er að semja staðalinn. Endanlegir notendur ættu að taka þátt í matinu og það ætti einkum að fjalla um þætti sem snerta hagkvæmni og notendavænleika og ætti að sýna fram á að unnt sé að koma staðlinum í framkvæmd á kostnaðarhagkvæman og hóflegan máta.
- 29) Ef Evrópustaðallinn um rafræna reikningagerð og skráin yfir þá málskipan, sem uppfyllir staðalinn sem saminn er af viðeigandi evrópskri staðlastofnun, fullnægir kröfunum í beiðni framkvæmdastjórnarinnar til evrópsku staðlastofnunarinnar, og ef staðallinn hefur verið prófaður, ætti að birta tilvísun í Evrópustaðalinn um rafræna reikningagerð og skrána yfir málskipan í *Stjórnartíðindum Evrópusambandsins*.
- 30) Ákvæðin um þróun staðalsins og annarra stöðlunarskjala sem mælt er fyrir um í þessari tilskipun eru í samræmi við viðeigandi ákvæði reglugerðar (ESB) nr. 1025/2012. Með tilliti til sérstakra eiginleika þessarar tilskipunar þykir þó rétt að kveða á um að ákvarðanir um að birta, birta ekki eða birta með takmörkunum, tilvísanir í staðalinn og skrána yfir málskipan, séu samþykktar í samræmi við rannsóknarmálsmeðferðina. Þetta ætti þó ekki að hafa áhrif á beitingu viðeigandi ákvæða reglugerðar (ESB) nr. 1025/2012 um formleg andmæli við samhæfðum stöðlum.
- 31) Evrópskar staðlastofnanir endurskoða staðla reglulega og uppfæra þá til að bregðast við tækniþróun. Í ljósi hraðrar þróunar í upplýsinga- og fjarskiptatæknigeiranum ætti framkvæmdastjórnin einnig að hafa möguleika á að óska eftir því að viðeigandi evrópsk staðlastofnun endurskoði og uppfæri Evrópustaðalinn um rafræna reikningagerð til þess að taka megillit til þessarar þróunar og tryggja viðvarandi rekstrarsamhæfi hans.
- 32) Framkvæmdastjórnin ætti að geta samþykkt framkvæmdargerð til að endurskoða og uppfæra skrána yfir málskipan til að bregðast við tækniþróun eða kröfum markaðarins. Ef um er að ræða flóknari leiðréttingar ætti framkvæmdastjórnin einnig að geta óskað eftir því að viðeigandi evrópsk staðlastofnun endurskoði og uppfæri skrána yfir málskipan.
- 33) Framkvæmdastjórnin ætti að geta endurskoðað skrá yfir málskipan, sem þegar hefur verið birt, ef hún telur það nauðsynlegt til að tryggja fullt og viðvarandi rekstrarsamhæfi, taka mið af tækniþróun eða takmarka fjölda málskipanargerða sem á að nota. Í þessu samhengi skal framkvæmdastjórnin taka mið af skránni yfir málskipan sem viðeigandi evrópsk staðlastofnun hefur ákvarðað, endurskoðað og uppfært.
- 34) Í lok frestsins til lögleiðingar sem mælt er fyrir um í þessari tilskipun ætti samningsyfirvöldum og samningsstofnunum að veraskylda taka á móti og vinna rafræna reikninga sem uppfylla Evrópustaðalinn um rafræna reikningagerð og einhverja þá málskipan í skránni sem framkvæmdastjórnin hefur birt í *Stjórnartíðindum Evrópusambandsins*. Samningsyfirvöld og samningsstofnanir ættu þess vegna ekki að hafna rafrænum reikningum sem uppfylla skilyrðin hér að framan eingöngu af þeirri ástæðu að þeir uppfylla ekki aðrar kröfur (t.d. landsbundnar kröfur eða kröfur innan sértæks geira, eða hvers konar tæknilegar viðbótarkröfur) en þær sem er sérstaklega kveðið á um í tilskipun þessari. Þó ætti þessi skuldbinding ekki að hafa áhrif á aðrar knýjandi ástæður fyrir höfnun, s.s. þær sem varða samningssskilyrði. Áður en samningsyfirvöld og samningsstofnanir greiða reikninginn ættu þeim a.m.k. að vera frjálst að sannreyna hvort innihald rafræns reiknings endurspeglar á réttan hátt þau viðskipti sem liggja til grundvallar (t.d. hvort reikningsfjárhæðin er rétt) og hvort reikningurinn hefur verið stílaður á réttan viðtakanda. Skyldan til að hafna ekki rafrænum reikningum í samræmi við tilskipun þessa er með fyrirvara um tilskipun Evrópuþingsins og ráðsins 2011/7/ESB⁽¹³⁾.

⁽¹³⁾ Tilskipun Evrópuþingsins og ráðsins 2011/7/ESB frá 16. febrúar 2011 um átak gegn greiðsludrætti í verslunarviðskiptum (Stjtid. ESB L 48, 23.2.2011, bls. 1).

- 35) Samkvæmt þessari tilskipun ætti aðeins að krefjast þess að viðtakendur reiknings, þ.e. samningsyfirvöld, miðlægar innkaupastofnanir og samningsstofnanir, taki á móti og vinni rafræna reikninga. Tilskipunin ætti ekki að hafa áhrif á rétt sendanda reikningsins til að velja hvort hann vilji senda reikninginn í samræmi við Evrópustaðalinn um rafræna reikningagerð, í samræmi við landsbundna eða aðra tæknistaðla eða á pappír. Þó ætti þessi tilskipun ekki að hindra að aðildarríki geti krafist þess að eingöngu séu sendir rafrænir reikningar innan ramma opinberra innkaupa. Ef sendandinn kys að nota Evrópustaðalinn um rafræna reikningagerð þegar hann sendir reikning ætti skylda viðtakandans að því er varðar móttöku og meðferð aðeins að gilda ef reikningurinn er með einhverri þeirri málskipan sem er að finna í skránni yfir málskipan sem hefur verið birt í *Stjórnartíðindum Evrópusambandsins*. Þetta ætti ekki að hafa áhrif á möguleika sendandans til að nota sér þjónustu þriðja aðila til að þýða reikninginn af sinni eigin málskipan yfir á aðra málskipan í skránni.
- 36) Haft var samráð við Evrópsku persónuverndarstofnunina í samræmi við 2. mgr. 28. gr. reglugerðar Evrópuþingsins og ráðsins (EB) nr. 45/2001⁽¹⁴⁾ og skilaði hún álit 11. nóvember 2013⁽¹⁵⁾. Í álit hennar voru birt tilmæli um að tryggja fullnægjandi gagnavernd við beitingu þessarar tilskipunar. Hafa ætti þessi tilmæli í huga þegar Evrópustaðallinn um rafræna reikningagerð er saminn og við vinnslu persónuupplýsinga af hálfu samningsyfirvalda og samningsstofnana. Einkum ætti að koma skýrt fram að núverandi lög um gagnavernd gilda einnig á sviði rafrænnar reikningagerðar og að birting persónuupplýsinga í þágu gagnsæis og ábyrgðar verður að haldast í hendur við verndun einkalífs.
- 37) Þar sem tilskipun 2006/112/EB inniheldur reglur um reikningagerð, þ.m.t. rafræna reikningagerð, ætti að skýra tengsl hennar við þessa tilskipun. Samkvæmt þessari tilskipun er stefnt að öðru markmiði og gildissvið hennar er frábrugðið gildissviði tilskipunar 2006/112/EB, þar af leiðandi hefur hún ekki áhrif á ákvæðin um notkun rafrænna reikninga vegna virðisaukaskatts sem þar er að finna. Einkum gildir 232. gr. tilskipunar 2006/112/EB um samskipti milli viðskiptaaðila og er ætlað að tryggja að sendandinn geti ekki skyldað viðtakandann til að nota rafræna reikninga. Þetta ætti þó ekki að hafa áhrif á rétt aðildarríkja til að skylda samningsyfirvöld og samningsstofnanir til að taka við rafrænum reikningum við tiltekna aðstæður.
- 38) Til að samningsyfirvöldum og samningsstofnunum sé gert kleift að undirbúa og framkvæma á réttan hátt tæknilegar ráðstafanir sem eru nauðsynlegar til að fara að þessari tilskipun, þegar settur hefur verið Evrópustaðall um rafræna reikningagerð og skrá yfir málskipan hefur verið samþykkt, og í ljósi þess að nauðsynlegt er að rafrænni reikningagerð verði hrint í framkvæmd með skjótum hætti, ætti að teljast réttlætjanlegt að veita 18 mánaða frest til lögleiðingar hennar, eftir birtingu tilvísunar í Evrópustaðalinn um rafræna reikningagerð og skrárinnar yfir málskipan í *Stjórnartíðindum Evrópusambandsins*. Með undanþágu frá þessum almenna fresti til lögleiðingar og til þess að greiða fyrir innleiðingu rafrænnar reikningagerðar hjá tilteknum samningsyfirvöldum, s.s. staðbundnum eða svæðisbundnum samningsyfirvöldum og opinberum fyrirtækjum, ætti aðildarríkjunum að vera heimilt að fresta beitingu þessarar tilskipunar af hálfu samningsyfirvalda og samningsstofnana, sem ekki eru á vegum ríkisins, þar til 30 mánuðum eftir birtingu tilvísunar í Evrópustaðalinn um rafræna reikningagerð og skrárinnar yfir málskipan í *Stjórnartíðindum Evrópusambandsins*. Þessi möguleiki á að fresta beitingu krafanna í þessari tilskipun ætti ekki að gilda um miðlægar innkaupastofnanir.
- 39) Til að auðvelda samningsyfirvöldum og samningsstofnunum að hrinda kröfum þessarar tilskipunar í framkvæmd ætti framkvæmdastjórnin að tryggja að aðildarríkin séu að fullu og með reglubundnum hætti upplýst um framvindu verksins að því er varðar þróun staðalsins og tengdra stöðlunarskjala sem viðeigandi evrópsk staðlastofnun á að sjá um. Þetta ætti að gera aðildarríkjunum kleift að ráðast í nauðsynlegan undirbúning með það fyrir augum að ljúka framkvæmd innan þess frests sem var samþykktur.
- 40) Þar sem samningsyfirvöld og samningsstofnanir munu geta samþykkt rafræna reikninga sem uppfylla aðra staðla en Evrópustaðalinn um rafræna reikningagerð og einnig reikninga á pappír, nema kveðið sé á um annað í landslöggjöf, leggur þessi tilskipun engan viðbótarkostnað eða fyrirhöfn á fyrirtæki, þ.m.t. örfyrirtæki, lítil og meðalstór fyrirtæki í skilningi tilmæla framkvæmdastjórnarinnar 2003/361/EB⁽¹⁶⁾. Framkvæmdastjórnin og aðildarríkin ættu enn fremur að gera allt sem í þeirra valdi stendur

⁽¹⁴⁾ Reglugerð Evrópuþingsins og ráðsins (EB) nr. 45/2001 frá 18. desember 2000 um vernd einstaklinga í tengslum við vinnslu persónuupplýsinga, sem stofnanir og aðilar Bandalagsins hafa unnið, og um frjálsa miðlun slíkra upplýsinga (Stjtíð. EB L 8, 12.1.2001, bls. 1).

⁽¹⁵⁾ Stjtíð. ESB C 38, 8.2.2014, bls. 2.

⁽¹⁶⁾ Tilmæli framkvæmdastjórnarinnar 2003/361/EB frá 6. maí 2003 um skilgreiningu á örfyrirtækjum og litlum og meðalstórum fyrirtækjum (Stjtíð. ESB L 124, 20.5.2003, bls. 36).

til að lágmarka kostnað notenda af Evrópustaðlinum um rafræna reikningagerð, einkum örfyrirtækja, lítilla og meðalstórra fyrirtækja, til að auðvelda upptöku hans í öllu Evrópusambandinu.

- 41) Við framkvæmd þessarar tilskipunar ættu aðildarríkin að taka tillit til þarfa lítilla og meðalstórra fyrirtækja og minni samningsyfirvalda og samningsstofnana og bjóða öllum samningsyfirvöldum, samningsstofnunum og birgjum nauðsynlegan stuðning svo að hægt sé að nota Evrópustaðalinn um rafræna reikningagerð. Enn fremur ætti að gera ráðstafanir til þjálfunar, einkum fyrir lítil og meðalstór fyrirtæki.
- 42) Til að greiða fyrir þeim tæknilegu og verklagstengdu breytingum sem allir aðilar, sem koma að opinberum innkaupum, þurfa að gera til að tryggja árangursríka framkvæmd þessarar tilskipunar, ættu aðildarríkin, eftir því sem unnt er, að gera aðstoð frá uppbyggingarsjóðnum aðgengilega fyrir öll aðstoðarhæf yfirvöld, samningsstofnanir og lítil og meðalstór fyrirtæki.
- 43) Fela skal framkvæmdastjórninni framkvæmdarvald til að tryggja samræmd skilyrði fyrir framkvæmd þessarar tilskipunar og til að semja, takmarka og endurskoða skrána yfir málskipan. Þessu valdi ætti að beita í samræmi við reglugerð (ESB) nr. 182/2011. Beita ætti rannsóknarmálsmeðferðinni við samþykkt framkvæmdargerða að því er tekur til skrárinnar yfir málskipan, með tilliti til þess að henni er ætlað að auðvelda beitingu Evrópustaðalsins um rafræna reikningagerð og tryggja rekstrarsamhæfi hans og skjót viðbrögð við tækniþróun. Einnig ætti að beita rannsóknarmálsmeðferðinni við samþykkt framkvæmdargerða að því er tekur til andmæla við Evrópustaðlinum um rafræna reikningagerð, þar sem slíkar gerðir gætu haft afleiðingar fyrir skylduna til móttöku og vinnslu á rafrænum reikningum.
- 44) Þar eð aðildarríkin geta ekki fyllilega náð markmiðum þessarar tilskipunar, þ.e. að ryðja úr vegg markaðshindrunum og viðskiptahindrunum af völdum mismunandi reglna og staðla í einstökum aðildarríkjum og tryggja rekstrarsamhæfi, og þeim verður betur náð á vettvangi Sambandsins, er Sambandinu heimilt að samþykkja ráðstafanir í samræmi við nálægðarregluna eins og sett er fram í 5. gr. sáttmálans um Evrópusambandið. Í samræmi við meðalhófsregluna, eins og hún er sett fram í þeirri grein, er ekki gengið lengra en nauðsyn krefur í þessari tilskipun til að ná þessum markmiðum.

SAMÞYKKT TILSKIPUN ÞESSA:

1. gr.

Gildissvið

Tilskipun þessi gildir um rafræna reikninga sem gefnir eru út vegna framkvæmdar samninga sem falla undir tilskipun 2009/81/EB, tilskipun 2014/23/ESB, tilskipun 2014/24/ESB eða tilskipun 2014/25/ESB.

Tilskipun þessi gildir ekki um rafræna reikninga sem eru gefnir út vegna framkvæmdar samninga sem falla undir gildissvið tilskipunar 2009/81/EB þar sem lýst hefur verið yfir að innkaupin eða framkvæmd sérleyfisins sé leynileg eða þeim verði að fylgja sérhæfðar öryggisráðstafanir í samræmi við gildandi lög eða stjórnsýslufyrirmæli í aðildarríki, og að því tilskildu að aðildarríkið hafi ákvarðað að ekki sé hægt að tryggja viðkomandi mikilvæga hagsmuni með aðgerðum sem ekki ganga eins langt.

2. gr.

Skilgreiningar

Í þessari tilskipun er merking eftirfarandi hugtaka sem hér segir:

- 1) „rafrænn reikningur“: reikningur sem hefur verið gefinn út, sendur og móttakinn á skipulega uppsettu, rafrænu sniði sem gefur kost á sjálfvirkri og rafrænni meðferð,
- 2) „meginstök rafræns reiknings“: nauðsynlegir upplýsingaþættir sem rafrænn reikningur verður að innihalda fyrir rekstrarsamhæfi yfir landamæri, þ.m.t. nauðsynlegar upplýsingar til að tryggja samræmi við lög,
- 3) „merkingarfræðilegt gagnalíkan“: skipulega uppsett röð hugtaka, sem eru tengd innbyrðis með rökrænum hætti og merking þeirra, þar sem meginstök rafræns reiknings eru tilgreind,

- 4) „málskipan“: tölvulesanlegt tungumál eða mállýska sem stendur fyrir gagnastökin sem rafrænn reikningur inniheldur,
- 5) „málskipanarbindingar“: viðmiðunarreglur um hvernig merkingarfræðilegt gagnalíkan fyrir rafrænan reikning gæti komið fram í ýmissi málskipan,
- 6) „samningsyfírvöld“: samningsyfírvöld eins og þau eru skilgreind í tilskipun 2009/81/EB (17. lið 1. gr.), tilskipun 2014/23/ESB (1. mgr. 6. gr.) og tilskipun 2014/24/ESB (1. lið 1. mgr. 2. gr.),
- 7) „samningsyfírvöld sem ekki eru yfírvöld á vegum ríkisins“: samningsyfírvöld sem ekki eru yfírvöld á vegum ríkisins eins og þau eru skilgreind í 3. lið 1. mgr. 2. gr. tilskipunar 2014/24/ESB,
- 8) „miðlæg innkaupastofnun“: miðlæg innkaupastofnun eins og skilgreint er í 16. lið 1. mgr. 2. gr. tilskipunar 2014/24/ESB,
- 9) „samningsstofnanir“: samningsstofnanir eins og þær eru skilgreindar í tilskipun 2009/81/EB (17. lið 1. gr.), tilskipun 2014/23/ESB (1. og 2. mgr. 7. gr.) og tilskipun 2014/24/ESB (1. mgr. 4. gr.),
- 10) „alþjóðlegur staðall“: alþjóðlegur staðall eins og hann er skilgreindur í a-lið 1. mgr. 2. gr. reglugerðar (ESB) nr. 1025/2012,
- 11) „Evrópustaðall“: evrópskur staðall eins og hann er skilgreindur í b-lið 1. mgr. 2. gr. reglugerðar (ESB) nr. 1025/2012.

3. gr.

Að setja Evrópustaðal

1. Framkvæmdastjórnin skal fara þess á leit að viðeigandi evrópsk staðlastofnun semji drög að Evrópustaðli um merkingarfræðilegt gagnalíkan fyrir meginstök rafræns reiknings („Evrópustaðal um rafræna reikningagerð“).

Framkvæmdastjórnin skal krefjast þess að Evrópustaðallinn um rafræna reikningagerð uppfylli a.m.k. eftirfarandi viðmiðanir:

- hann er tæknilega hlutlaus,
- hann samrýmist viðeigandi alþjóðlegum stöðlum um rafræna reikningagerð,
- hann tekur tillit til nauðsynlegrar gagnaverndar í samræmi við tilskipun 95/46/EB, nálgunar sem felur í sér innbyggða gagnavernd og meginreglnanna um meðalhóf, lágmörkun gagna og takmörkun vegna tilgangs,
- hann er í samræmi við viðeigandi ákvæði tilskipunar 2006/112/EB,
- með honum er mögulegt að koma á fót hagnýtum, notendavænum, sveigjanlegum og kostnaðarhagkvæmum kerfum fyrir rafræna reikningagerð,
- með honum er tekið tillit til sérstakra þarfa lítilla og meðalstórra fyrirtækja auk samningsyfírvalda og samningsstofnana sem eru ekki yfírvöld og stofnanir á vegum ríkisins,
- hann hentar til notkunar í verslunarviðskiptum milli fyrirtækja.

Framkvæmdastjórnin skal óska eftir því við viðeigandi evrópska staðlastofnun að hún ákvarði takmarkaða skrá yfir þá málskipan sem uppfyllir Evrópustaðalinn um rafræna reikningagerð, viðeigandi málskipanarbindingar og viðmiðunarreglur um rekstrarsamhæfi sendingar, til þess að greiða fyrir notkun þess staðals.

Beiðnirnar skulu samþykktar í samræmi við málsmeðferðina, sem mælt er fyrir um í 1.–5. mgr. 10. gr. reglugerðar (ESB) nr. 1025/2012.

Liður í vinnu viðeigandi evrópskrar staðlastofnunar við að þróa staðalinn, innan þess tímaramma sem tilgreindur er í 2. mgr., er að prófa staðalinn með tilliti til beitingar hans í reynd af hálfu endanlegs notanda. Framkvæmdastjórnin ber heildarábyrgð á prófuninni og skal tryggja að meðan prófunin fer fram sé tekið sérstakt tillit til þess að virða viðmiðanirnar um hagkvæmni, notendavænleika og mögulegan kostnað við framkvæmd í samræmi við aðra undirgrein 1. mgr. Framkvæmdastjórnin skal senda skýrslu til Evrópuþingsins og ráðsins um niðurstöður prófunarinnar.

2. Ef Evrópustaðallinn um rafræna reikningagerð, sem er saminn í samræmi við beiðnina sem um getur í 1. mgr., fullnægir kröfunum sem þar eru settar fram, og ef prófunarstigi í samræmi við fimmtu undirgrein 1. mgr. hefur verið lokið, skal framkvæmdastjórnin birta tilvísun í staðalinn í *Stjórnartíðindum Evrópusambandsins*, ásamt takmörkuðu skránni yfir málskipan sem samin er í samræmi við beiðnina sem um getur í 1. mgr. Sú birting skal fara fram eigi síðar en 27. maí 2017.

4. gr.

Formleg andmæli við Evrópustaðlinum

1. Telji aðildarríki eða Evrópuþingið að Evrópustaðallinn um rafræna reikningagerð og skráin yfir málskipan uppfylli ekki að fullu kröfurnar sem settar eru fram í 1. mgr. 3. gr. skal það tilkynna það framkvæmdastjórninni ásamt ítarlegri skýringu og skal framkvæmdastjórnin ákveða:

- a) að birta, birta ekki eða birta með takmörkunum, tilvísanir í viðkomandi Evrópustaðal um rafræna reikningagerð og skrána yfir málskipan í *Stjórnartíðindum Evrópusambandsins*,
- b) að viðhalda, að viðhalda með takmörkunum eða að afturkalla tilvísanir í viðkomandi Evrópustaðal um rafræna reikningagerð og skrána yfir málskipan í eða úr *Stjórnartíðindum Evrópusambandsins*.

2. Framkvæmdastjórnin skal birta upplýsingar á vefsetri sínu um Evrópustaðalinn um rafræna reikningagerð og skrána yfir málskipan sem hefur fallið undir ákvörðunina sem um getur í 1. mgr.

3. Framkvæmdastjórnin skal upplýsa viðkomandi evrópska staðlastofnun um ákvörðunina sem um getur í 1. mgr. og, ef nauðsyn krefur, óska eftir endurskoðun á viðkomandi Evrópustaðli um rafræna reikningagerð eða skránni yfir málskipan.

4. Samþykkinga skal ákvarðanirnar sem um getur í a- og b-lið 1. mgr. þessarar greinar í samræmi við rannsóknarmálsmeðferðina sem um getur í 2. mgr. 10. gr.

5. gr.

Viðhald og áframhaldandi þróun Evrópustaðalsins og skrárinnar yfir málskipan

1. Til þess að taka mið af tækniþróun og til að tryggja fullt og viðvarandi rekstrarsamhæfi í rafrænni reikningagerð við opinber innkaup getur framkvæmdastjórnin:

- a) uppfært eða endurskoðað Evrópustaðalinn um rafræna reikningagerð,
- b) uppfært eða endurskoðað skrána yfir málskipan sem framkvæmdastjórnin birtir í *Stjórnartíðindum Evrópusambandsins*.

2. Ákveði framkvæmdastjórnin að grípa til aðgerðarinnar, sem um getur í a-lið 1. mgr., skal hún beina beiðni til viðeigandi evrópskrar staðlastofnunar. Beiðnin skal vera í samræmi við málsmeðferðina sem um getur í 1. mgr. 3. gr., þó án beitingar tímamarkanna sem þar er kveðið á um.

3. Ákvæði 4. gr. skulu gilda um uppfærslu eða endurskoðun sem kemur til framkvæmda í samræmi við a-lið 1. mgr.

4. Ákveði framkvæmdastjórnin að grípa til aðgerðarinnar, sem um getur í b-lið 1. mgr., skal hún gera það annaðhvort í samræmi við rannsóknarmálsmeðferðina, sem um getur í 2. mgr. 10. gr., eða með því að beina beiðni til viðeigandi evrópskrar staðlastofnunar. Beiðnin skal vera í samræmi við málsmeðferðina sem um getur í 1. mgr. 3. gr., þó án beitingar tímamarkanna sem þar er kveðið á um.

6. gr.

Meginstök rafræns reiknings

Til meginstaka rafræns reiknings teljast m.a.:

- a) auðkenni ferlis og reiknings,
- b) reikningstímabilið,
- c) upplýsingar um seljanda,
- d) upplýsingar um kaupanda,
- e) upplýsingar um greiðanda,
- f) upplýsingar um skattafulltrúa seljanda,

- g) tilvísun í samning,
- h) upplýsingar um afhendingu,
- i) greiðslufyrirmæli,
- j) upplýsingar um afslætti eða gjöld,
- k) upplýsingar um einstaka reikningsliði,
- l) heildarfjárhæð reikningsins,
- m) sundurliðun á virðisaukaskatti.

7. gr.

Móttaka og meðferð rafræna reikninga

Aðildarríkin skulu tryggja að samningsyfirvöld og samningsstofnanir taki á móti og vinni úr rafrænum reikningum sem uppfylla Evrópustaðal um rafræna reikningagerð, ef tilvísun í hann hefur verið birt skv. 2. mgr. 3. gr. og einhverja þá málskipan í skránni sem hefur verið birt skv. 2. mgr. 3. gr.

8. gr.

Gagnavernd

1. Tilskipun þessi hefur ekki áhrif á gildandi lög Sambandsins eða landslög um gagnavernd.
2. Sé ekki kveðið á um annað í lögum Sambandsins eða landslögum og með fyrirvara um þær undantekningar og takmarkanir sem settar eru fram í 13. gr. tilskipunar 95/46/EB er eingöngu heimilt að nota persónuupplýsingar, sem fengnar eru vegna rafrænnar reikningagerðar, í þeim tilgangi eða í tilgangi sem samrýmist honum.
3. Með fyrirvara um þær undantekningar og takmarkanir, sem settar eru fram í 13. gr. tilskipunar 95/46/EB, skulu aðildarríkin tryggja, að því er varðar gagnsæi og reikningshald, að tilhögun vegna birtingar persónuupplýsinga, sem safnað er í tengslum við rafræna reikningagerð, samrýmist tilgangi slíkrar birtingar og meginreglunni um verndun einkalífs.

9. gr.

Notkun rafræna reikninga vegna virðisaukaskatts

Tilskipun þessi er með fyrirvara um ákvæði tilskipunar 2006/112/EB.

10. gr.

Nefndarmeðferð

1. Framkvæmdastjórnin skal njóta aðstoðar nefndar. Sú nefnd skal vera nefnd í skilningi reglugerðar (ESB) nr. 182/2011.
2. Þegar vísað er til þessarar málsgreinar gilda ákvæði 5. gr. reglugerðar (ESB) nr. 182/2011.

11. gr.

Lögleiðing

1. Aðildarríkin skulu samþykkja og birta nauðsynleg lög og stjórnsýslufyrirmæli og beita þeim til að fara að tilskipun þessari eigi síðar en 27. nóvember 2018. Þau skulu þegar í stað senda framkvæmdastjórninni texta slíkra ráðstafana.
2. Þrátt fyrir 1. mgr. skulu aðildarríkin, eigi síðar en 18 mánuðum eftir birtingu tilvísunar í Evrópustaðalinn um rafræna reikningagerð í *Stjórnartíðindum Evrópusambandsins*, samþykkja og birta nauðsynleg ákvæði og beita þeim til að uppfylla skuldbindinguna í 7. gr. um móttöku og meðferð rafræna reikninga.

Aðildarríkin geta frestað beitingunni sem um getur í fyrstu undirgrein að því er varðar samningsyfirvöld og samningsstofnanir þeirra, sem ekki eru á vegum ríkisins, þar til 30 mánuðum eftir birtingu tilvísunar í Evrópustaðalinn um rafræna reikningagerð í *Stjórnartíðindum Evrópusambandsins* hið lengsta.

Þegar tilvísun í Evrópustaðalinn um rafræna reikningagerð hefur verið birt skal framkvæmdastjórnin birta lokadagsetningu fyrir beitingu ráðstafananna, sem um getur í fyrstu undirgrein, í *Stjórnartíðindum Evrópusambandsins*.

3. Aðildarríkin skulu senda framkvæmdastjórninni helstu ákvæði úr landslögum sem þau samþykkja um málefni sem tilskipun þessi nær til.

12. gr.

Endurskoðun

Framkvæmdastjórnin skal endurskoða áhrif þessarar tilskipunar á innri markaðinn og á innleiðingu rafrænnar reikningagerðar í opinberum innkaupum og skal leggja skýrslu þar um fyrir Evrópuþingið og ráðið eigi síðar en þremur árum eftir lok hámarksfrestsins sem yfirvöldum, sem ekki eru á vegum ríkisins, er settur skv. annari undirgrein 2. mgr. 11. gr. Skýrslunni skal fylgja mat á áhrifum að því er varðar þörfina á frekari aðgerðum, eftir því sem við á.

13. gr.

Gildistaka

Tilskipun þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

14. gr.

Viðtakendur

Tilskipun þessari er beint til aðildarríkjanna.

Gjört í Strassborg 16. apríl 2014.

Fyrir hönd Evrópuþingsins,

M. SCHULZ

forseti.

Fyrir hönd ráðsins,

D. KOURKOULAS

forseti.